

MWAHA WO WAAMINI, MOISE



Kooxukhuru, Munna Neville. Mooxeleliwa, mw'atthu. Ti yooreera okhala va olelo mutapernakulo. Nto miyo kuupuwela khino Munna Neville aalavunle vaasiis'ula, miyo kaamulavula ohiy'ula. Nto vo miyo kuupuwela nto musomelo wa exikola y'Ettiminku ya vaassis'ula. Ni exeni e... Apwiya yatthuna, nnimwehererya o—okhalana musomelo wa exikola y'Ettiminku ula.

² Vano, soovira isumana piili vano, soophiyaka, vakenly'aka. Ni okhala oottetemerya vanci-ene ntoko nyuwo sinsuwel'anyu sana, wira, vapuwani, miyo kaanikhala vekeekhai, ookhulumuwa vanci-ene ni nkaawerya orowa ottaiwene. Nto vo kaahaana ovolowa wira kimumule vakhani. Nto kaanikhhalana mahiku oophiyaka mararu omukurekureni wa oWolf Creek, ohitto oKentucky, weiwo miyo oyariw'aka-wo. Miyo kaanuupuwela, "Oh, miyo kinnoona oreera paahi vano. Miyo ka mukumi."

³ Nto kaahithikela owani, nto etthu yoopacerya yamukhani yaakikumananne witho waari mwaha wa kuvernu ni mpoosito wa soophwanya. Miyo kaahitholathola-tho voomalela emara ekina. Vano kisuwela wira enoorowa ovikana esumana emosa wala piili wira kimumule.

⁴ Nto muteko aka otthunaka orukunuwa vano. Ni miyo nkirina mithukumano sitthokihiwe. Nto tivo miyo kikhumenly'aka okerekhere, ni khuupuwela, nto vano mwa isumana vakhani sinttharelana, miyo kaamurowa omumula, omumula woomalela, ni waawehererya Apwiya.

⁵ Ni anci-ene a nyuwo atthu mu, awo t'ale a khalai, ale ari ni hiyo okathi munci-ene, munnuupuwela wira etthu Apwiya anihimeenry'aya, Awo okathi wothene ahiira yeeyo Awo yaahimmy'aya wira yaamwiira.

⁶ Muupuwele, okathi wopaceryani-wene, mukereja mu, vaasiisu hiyo naathipenly'ahu nluke na etapernakulu, moota Awo... Eyo yoolempwa, ni yooheliwa vanlukuni, epaphelo-yopacerya ya Bibilia aka. Vaasiisu ule, yoowoona ele yuulupale, khwira, "Ela kehiyo etapernakulu anyu."

⁷ Miyo khwira, "Eri vai, Pwiya?" Owo khukihela vathi v'erimu. Nto Nsu nimosa khirwa. Nto miyo kahiweha khoona mikimanyo iye miraru, ntoko, miri ni mihokorokho saya, siiso. Nyuwo moosuwela yoowoona exeni. Eyo ti yoolempwa, ennikuxa iyakha.

⁸ Kittottaka, nihiku nimosa, eliivuru emosa ya khalai iwe, kisomaka itthu kamosa kamosa Apwiya saahimmy'aya, saahimmya'aya s'ohoolo; soomala wiiraneya. Mwaha wa itthu

iya s'amwaavano, ni mwaha wa moota ekhotto yaarow'aya okhumelela, n'itthu sothene iyo soolikana.

⁹ Itthu piili paahi sihanle, mwa emosa wa soohimmwa iye s'eprofeta suulupale. Eyo ti, ikaro okhala mphironi soweettihiwa ni eremote, sikhalaka ntoko nooce, nyuwo khamuneettiha eyo paahi. Eyo eniiseettiha mmansaya. Nto vo onookhala muthiyana mmosa oosuwanyeya onrowa ovenya, 'okhala wira Amerika elapo ya muthiyana. Nto eyo eno . . . Muthiyana mmosa oosuwanyeya onooovenya, akhale Mukhulupale wala etthu emosa ntoko yeeyo, mulaponi. Nto vo onimoorwa omalamala woomalela. Elapo yothehe enoonyanyiwa.

¹⁰ Nto, eyo, miyo kinoohimya . . . Vano ela kahiyo Apwiya anihimya ela. (Ekina, mwaha wa muthiyana, ti yawo, t'Apwiya.) Masi miyo kaahilopola, 1933, wira olumwenku waamukhala woomalamalihiwa voomalela ehinatthi ophiya '77.

¹¹ Vano, miyo nkaasuwela okathi uwo wira awo yaahikhalana etthu yaawerya omalamaliha ntoko awo sirin'aya vano, masi miyo kaahoono elapo yoomalamala voomalela, ixa sa miri paahi ni itthu ntoko siiso, ti saahanle.

¹² Vano, eyo eri mphironi. Ni vaari wira itthu iya sothene sikina sihaana wiiraneya v'ekeekhai ntoko Owo ohimmy'awe, eyo enookhala nave-tho, ti siiso v'keekhai ntoko Owo aahimmy'awe mwa Solempwa mu, etthu Owo onihimy'awe, vaari wira Kristu aahirwa emara yopacerya, Owo onimoorwa emara yaneenli. Ni itthu sothene Owo saahimmy'awe sinimwiiraneya. Nto v'orattene noonaka ela, ni nisuwelaka wira hiyo nri . . . nummaru nahu nnihaleela wiihaniwa, ntoko elapo, nisuwelaka wira Ekereja enihaleela ophwanya Okuxiwa waya. Eyo ennikuxa murima wa murumeyi, wala mutthu ti mutthu a okristu, osuwela wira hiyo nri nihiku nla ni okathi hiyo onikhal'ahu. Ola okathi muulupalexa mutthu ti mutthu otonko awe okhala mulaponi, ti naanaano va; eyo ti, wa Ekereja. Vano, miyo v'ekeekhai kinnitthuna mavekelo anyu.

¹³ Nto vo miyo kinnoona mutapernakulu, ni woona wira awo yaahikhalana . . . yaarowa okhalana mwaathanle mukina ni itthu sothene, mukereja, wa amosa amosa a nikhuru na maatiministaratore n'akina.

¹⁴ Nto—nto ekereja yaanitthuna muthukumano mukhani, mutumereryo mwamukhani. Nto nyuwo okathi wothene munnikhala ookireerela murima miyo, ni okivaha iparakha. Nto mwa miyo okhala va, enikhala ntoko eparakha wa nyuwo. Ni miyo kookupali wira, okhala ni nyuwo, enikhala eparakha wa miyo. Ni nyuwo okathi wothene munnikhupali etthu miyo enihimy'aka okhala Ekeekhai, ntoko miyo sinoon'aka vamaithoni va Muluku. Nto miyo—miyo kinnixukhurela yeeyo.

¹⁵ Vano nto, miyo kaahipacerya, nto vo miyo kaarowa osuwela, ni okhalana ekereja ahu yoolipihiwa, mwa maatiministaratore

aya, nto vo wira akhale mwaathanle ni sikina. Nto vo—vo, miyo kaahuupuwela, numala yeeyo, kaahikhuma kikhhalana omumula vakhani kihinatthi orowa-tho vapuwani emara ekina.

¹⁶ Mukhale ni yeeyo eriyari anyu. Vano, eyo kehiyo y'anamurwa. Eyo ti y'etapernakulu yela. Hiyo nintthuna muthukumano ni etapernakulu yela, wira itthu sothene, ni khula yoovonyeya, itthu sothene sinikhala siiraneyaka, ni alakela miyoonelo saamukhaani sa mutthu ni mukhw'awe; ale, miyo kinrowa okhala ni khula mmosa a yawo ni kaaruhe ethoni ni ethoni. Vano nyuwo mwaahitthuneke woonana ni yeeyo, vanreerela mukhume mulaponi; 'okhala wira nyuwo munoorwa woonana ethoni ni ethoni khula epannte ya yeeyo, ntoko hiyo siirak'ahu va otapernakulu. Ni sothene okhala soolakiheriwa, okhala wira hiyo n'axinna alopwana n'athiyana nnikawana ekomunyau, Erutthu ya Kristu, eriyari ya mesa a iparakh. Ni kehiyo hat'etthu masi xetwani aamukhaliha etthu p'itthu wira ekhale yoovonyeya, ni aamukhaliha miyoonelo, wala ohonona, wala etthu p'itthu siiso. Nto miyo kinimukuxa Munn'ihu Neville, ni hiyo ninrowa nipuro nipuro, ni waaruuha athu w'atthu, vamosa, mpakha etapernakulu otthika, okhalihiwa saana tho, mwa weemela waya, wira eroweke ohoolo mwaha w'Omwene wa Muluku. Vano, owo ti, mwaha miyo onihimery'aka ela, okhala wira eyo eri ni nikhuru n'ahu namukhani va vaasiis'ula.

¹⁷ Nto vano kinrowa omumula vakhani, ni kihokolowe vowaakuvaxa ntoko sinwery'aka. Nto kinwehererya orowa vapuwani emara ekina. Nto okathi ula, Apwiya yatthuna, miyo kintthuna kikuxe vakhani hiyo nisunk'ahu wa musurukhu, ni siiso, wawaka kimwanene, ota mwa e... mutthokiheryo ola wa muteko wa ilapo s'okhopela. Ni okithumela eheema esya, ni ikaruma kamosa kamosa isya, n'upacerya vapuwani. Kahi okhuma ekereja mpakha ekereja, masi orowa mmithukumanoni mwahu yohi.

¹⁸ Vano, kahi wo ohaattitimiha axinna ale akilattunle, yeeyo ekhanle etthu yooreera. Masi vanci-enexa mwa yothene eyo, nyuwo muniphwanya mithukumano iya, awo aniira nyuwo munrowa okhala weiwo, nto axipathan'inyu othene anookela, nto vo yothene enikhala ocaliwa wuulupale mwaha wa musurukhu. Enaamaliha athu ale paahi. Miyo kinoopacerya wona paahi, nyuwo moone. Vano eyo—eyo kehiyo yooreera. Hiyo nintthuna nikhalane nipuro nimosa vaavo onwery'ahu waaruuha. Nyuwo khamurina y'oruuha musurukhu anyu. Murwe paahi, mmansinyu, nto—nto mwaarumele Apwiya. Munnona? Nto siiso vano. . .

¹⁹ Nto muteko aka woorukunuwa naanaano va. Nyuwo munnuupuwela okathi miyo kaavarelak'aka ntata na mutthu, ni weemela vale paahi, nto Apwiya yaanikileela exeni yaari mukattyamiho aya. Khwira, "Nto yaamurowa wiiraneya, nyuwo munoosuwela esiiri sa mmurimani mw'atthu." Khula mmosa a

nyuwo onnisuwela wira eyo enniiraneya voomalela ntoko Eyo yaahimmy'aya. Vano nla nivalo noottarelana, nenno nihimmwe ni nilopoliwe, nenno ninrowa okhala ottaiwene ovikana khula etthu ya Yeeyo, nyuwo moone. Ni ti naanaano va v'orukunuwani.

²⁰ Nto tivo Satana oniwan'awe ni miyo ni mpoosito wa soophwanya, eereryaka okileela, kuvernu, wira miyo kinnilokihwa mpoosito wa soophwanya mwa khula epenny miyo ekunx'aka, ntoko murumeyi, okhuma iyakha miloko miili ni thanu na piili sivinre, kikenly'aka mmutekoni. Kahi siiso, 'okhala wira owo waavira mukereja mu.

²¹ Miyo ki mukhapeleli a musurukhu a ekereja ela. Eyo ekeekhai voomalela. Eyo ti yookaravariwa mu. Vano, nto, miyo kaakhanle-ene mukhapaleli ni namapweha muhakhu a ekereja ela, nto khiyavo hat'etthu molumwenkuni...Kuvernu kharina nata ni eyo. Awo khanikoha ekereja. Awo anikikoha miyo kikhanle mulipa-opweha muhakhu wa mukereja. Ni maatiministratore aalepa epaphelo eri opanku wu, wira misurukhu s'aka sothene...Ohiya okhalana mutthenkeso aka mmansaka, miyo kaaveleela mukereja mw'aka mu, 'okhala wira voohupuwelela owo mutthenkeso, khula enamuna.

²² Nto wira yeeyo, ennikikhaliherya miyo ohitthyawa mukereja n'uhya, n'urowa ota ni ohikhala hat'etthu va. Vamanly'aka waahimeerya athu wira miyo kaamutthikela mukereja, okathi p'ukathi, ni waakhaliherya. Tivo miyo kikhanly'aka siiso, okhala wira miyo koomulapa natiri wa nyuwo athu. Tivo miyo kinikhal'aka n'iyo siiso, ohiya okhalana mutthu mmosa. Nto, nyuwo mwaira yeeyo, eyo eniruuhela mutthenkeso. Nto miyo kiri voolipa-wene oovirikanya mutthenkeso. Vano miyo—miyo kinookhalana siiso eyo eryaya, mmatatani mwa Muluku, wira hiyo niwerye orowa ohoolo mwa Omwene wa Muluku.

²³ Vano, vaasiisu ula, hiyo nintthuna nisome Masu ala ooreerihwa a khalai, ni wamini.

²⁴ Vano, miyo kintthuna kihimye, tho...Miyo kinnimoona Munna Egan ni anci-ene, amosa amosa wa maatiministratore akilanthi-ene va, vaamanly'ahu okhalana muthukumano ahu wa maatiministratore, ohiyu umosa; eyo ekeekhai, voosuweleya ohoolo w'ekereja, wira khula mmosa a nyuwo othene kahiyo tho a—atiministratore ooromoliwa. Nyuwo mwa maatiministratore oothanliwa, ni masina anyu ari mmaliivuruni. Vaareera.

²⁵ Nto vano enoorowa okhalaniwa mwathanle mukina tho a—matiyakono, ni sikina. Nto Munna Neville ti, onrowa owiihanaka awo naanaanoru numala muteko ola, vaareera, ni wa anamasuka muhakhu ni sikina, okathi onivenx'ahu ekereja. Mwiiwelele, ilipiheryo sothene, soolikana, nto hiyo nnoowerya okhalana muhakalaliho okathi onirw'aya.

²⁶ Vano, okathi vakhani nihinatthi okhunla makukhu va, wa musomelo ahu wa exikola y'Ettiminku, wa Masu ala maalupale

a Muluku mukumi, nrowe nuuramihe miru sahu, okathi vakhani, okathi onlavul'ahu ni Mwanene Eliivuru ila. Nto vano mukumihe khula muupuwelo, itthu sothene siri soovirikana, sinookhottiheryani okhalana eparakha.

Nivekele.

²⁷ Muluku oowaryaxa ni a exariya, Ohoolo Wanyu woottittimiheya hiyo ninnoorwa vano, noovahereryakani Nyuwo makhalelo ahu, ni mi—minepa sahu, ni irutthu sahu, ni miteko sahu, ni irattelo sahu. Ni sothene hiyo sirin'ahu, hiyo ninniruuha seiyo wa Nyuwo. Nto okathi Nyuwo onniweh'anyu hiyo, Pwiya, yakhala etampi ekumiheriwe ni ehilampwe, hiyo ninnoovekelani Nyuwo, O Pwiya Muluku, wira Nyuwo muhelele Ephome ya Mwan'Inyu, Yesu, nipuro nenno. Maana, nisuwelaka wira hiyo mmansihu n'ohimalela, ni vo ti yoohiweryaneya wa hiyo okhalakhala nikhalaka owiikhaliherya mmansihu. Masi hiyo ninlipa voomalela mw'Ephome Awe yooreeraxa, ni mahala Awe wira ohelele wa mwaha ahu, wira hiyo anatampi oohiphwanela niwerye orwa voochoova nihiku nno Ohoolo Wanyu, niruuhaka ohoolo wahu Ephome yela ya Pwiya Yesu. Yeeyo, Nyuwo, okathi ovinre, mwaasuwenly'anyu okhala Ephome ya Mwan'Inyu mmose-ene, ni omulampy'anyu natiri, wira, "Mwa Yowo, hiyo nahimyaru itampi sahu, hiyo nnoleveleliwa mwa mahala Awe."

²⁸ Nto vano hiyo naamuvekela, Pwiya, wira Nyuwo munlevelele hiyo khula yoovonya, khula etampi y'ohithhara sooruma wala y'okhuwa, yootakhala, wira vaari wira khula muupuwelo wootakhala woohoma munepa ahu, ni matthere a mooro a xetwani, wira Nyuwo mmukumihe nwanani ula ootakhala a Nyuwo, ni a athu Anyu.

²⁹ Ni hiyo ninvekela wira Nyuwo muvelelelihe Eroho Yowarya wira evarelele Masu okathi ula, okathi hiyo nniivaherery'ahu ntoko ikaruma, wira Nyuwo mulavule mwa hiyo, ni wiiwa mwa hiyo, Masu Anyu. Ni wira hiyo w'ohokolowani naakhele Yeeyo wa Nyuwo, ni nikhume nipuro nna, olelo, noonaka wira hiyo noolikanyihwa-tho mwaha wa Kristu; wira hiyo niwerye okhala ooloka oolikana wa muteko w'ohiy'ula ni melo, mwaha w'othotola wa Eroho Yowarya.

³⁰ Mwaareerihe axinn'ihu mapuro othene, ikereja siri mulaponi, sinihimya Masu a Ekumi nihiku nna nootakhala. Hiyo ninnona wira khokhanle okathi munci-ene ohanle w'ovara muteko, maana ohiyu onimoorwa vowaakuva. Meeku a ekhotto anooveveleya tho. Otakhala ori mmatatani, nto hiyo ninvekela wira Nyuwo munihye nivare muteko ntoko sihitonko ahu khalai. Mmumulihe irutthu sahu sookhulumuwa, Pwiya, ni munithikiherye okhottoni. Maana hiyo ninvekela mwa Nsina na Pwiya Yesu, ni mwaha wa Yowo hiyo ninnivekela. Amen.

³¹ Nimukhunlaka, Bibilia, vaasiisu ula, e—ekapitulu 11 y'Eliivuru ya aHeperi.

³² Namararu ohiyu hiyo naalavula ekepitulu 7 y'Eliivuru ya aHeperi, ya "Melikhiseteki, ahikhalanne tithi, ni ahikhalanne mayi, oohikhalana opacerya wa mahiku, wala emalelo y'ekumi."

³³ Nto miyo kaahupuuwela, khino, vaasiis'ula, yaamukhala yoophwanelela okhunla tho Eliivuru ila yooreraxa, okhala wira hiyo nookhalana ilipiheryo wa etthu emphavel'ahu ohimya, mwa osoma wa khalai. Nto nituphelaka ekapitulu 10, ni ekapitulu 9, yeeyo eri ikano sa mukuttho, hiyo naamurwa mpakha nipuro no "wamini." Nto va muLivuruni mwa aHeperi, ekapitulu 11, nto nipaceryaka eversikulu 23, Eyo enisommwa so:

Mwaha wo wamini Moise, okathi wayariw'awe, aahiipithihiwa miyeeri miraru n'axitith'awe, okhala wira awo yahoona wira owo aari mwana ooreera; nave awo khayonve nlamulo na mwene.

Mwaha wo wamini Moise, okathi ophiyenry'awe iyakha, khatthunne wiireliwa mwana a mwan'awe Farawo muthiyana;

Athanlaka ohaaxiwa vamosa n'atthu a Muluku, ehikhanle opuha n'itthu sa etampi okathi vakhani;

Onaka othanyiwa wa Kristu ntoko muhakhu muulupale ovikana muhakhu wa w'Ejitu: . . . ni aahiwehaxaxa otthuveliwa w'ohoolo.

Mwaha wo wamini aahikhuma w'Ejitu, ahoovaka onanariwa wa mwene: tthiri owo aahilipiha murima, ntoko onimoona ole ohinooneya.

³⁴ Miyo kintthuna kikuxe mwaha, vaasiis'ula, "othanla mwaha wo wamini." Ni kintthuna kikuxe wa yosoma, moolumo mararu oopacerya a ekapitulu 23, *Mwaha Wo Wamini, Moise*. Nto, "othanla mwaha wo wamini," itthu sothene sinci-ene hiyo nnir'ahu, nihaana othanla mwa wamini. Ni sothene hiyo siniphwany'ahu wira Moise aahiira, eri yoophwanela otthikela, waari mwaha wo wamini; kahi mwaha wo wona, masi mwaha wo wamini.

³⁵ Nto niwoko miyo ethanlenly'aka ela vaasiis'ula, wa ekereja mwa mukhalelo ola, ennikhala wira mwa yawihu. . .hata ixikola sahu, ni khula nipuro, hiyo ninnikhalana sinci-ene sa mwixuttiho wa siensia. Mwaha wa yela, hiyo nihaakumiha atthu m'owaminini. Vano, wamini khonooniheriwa ni siensia. Wamini t'ile siensia ohinoon'awe. Ni hiyo. . .Hiyo napwetexaru wamini nno wuulupale, vo hiyo nri mw'epiphini voomalela, eyo. . . hata wira oreera xeni nisomihiw'ahu, mwa sai naawery'ahu otaphulela Masu a Muluku, wira nisivelihe enamun'ahu yo okupali.

³⁶ Khekhanle hata enamuna y'omusiveliha Muluku, wamini paahi. Solempwa voowooneya sinnihimya eyo siiso, nto mwaha

wo wamini. “Ni wohikhala wamini,” sinihimya Solempwa, “ti yoohiweryaneya omusiveliha Muluku.”

³⁷ Vano, vaari wira wamini onnivirikana ni siensia, ni siensia onnivirikana ni wamini, eyo ennihela iyo o—oxiixi emosa ni ekhw’aya, vo hiyo nihaana othanla ntoko Moise siiraly’awe. Mwa wamini hiyo ninnaamini!

³⁸ Vano, hiyo napwetexaru wamini, vo khaninkhalakhala nikhalanaka nivekelo nowaakhuliwa ni Muluku. “Maana ole onirwa wa Muluku ohaana toko wamini wira Owo ookhala, ni namatthuvela a ale animphavela Yowo voviilipiha.” Vano, hiyo napwetexaru wamini, mavekelo ahu anoofuciwa; khaninrowa hata vatthu.

³⁹ Vano eyo ti yothene hiyo enwery’ahu wuupuwela, vaasiisu ula, olipiherya wamini. Nto, hiyo napwetexaru wamini, ororomela wahu wothena woomala. Ni hiyo napwetexaru wamini, ekeekhai ahu yothene ya murohoni yoomala. Maana, khivanweryaneya okhalana wamini mwa itthu sinoon’anyu, maana itthu sinoon’anyu sothene sinnipweteya.

⁴⁰ Hiyo namuweharu mutthu mmosa muulupale, murumeyi muulupale, wala muthukumano muulupale, iyo sothene sinoopweteya, nihiku nno. Ni hiyo naweharu elapo yuulupale, wala kapwitthi muulupale, sothene iyo sinoopweteya, nihiku nno. Nto vo hiyo nihaana okhala mwa wamini, wa itthu iye siensia ohinihimy’awe. Ti mwa wamini hiyo nnaamin’ahu.

⁴¹ Vano, hiyo nnopwetexa nttittimiho nahu napwetexaru wamini. Vano, nakhumaru m’owaminini, vo hiyo nikelihia ekereja mmukhaleloni mwa ankhili.

⁴² Ni imara sinci-ene, ennuupuweliwa, eriyari y’atthu, wira okhala wira muthukumano waari muulupale, ni wira awo yaarina ikereja suulupale, anamukattha aalupale, ni yuulupale, atthu anci-ene oowara sana ni owiixuttihiwa, ni misurukhu sinci-ene, wira awo yaamuwerya wira itthu seiyo, hiyo, imara sinci-ene, noona wira owo waari muupululo, wira ekereja khata ela ehaana okhala yowuupuxeriwa ni Muluku. Wala, imara sinci-ene hiyo ninnaahimya arumeyi oohiyana-hiyana yawo ankhumela vapuwani n’ukhalana ottottelana wuulupale wa mittitthi, nto hiyo nnupuwela, imara sikina, wira iyo ithoonyeryo sa muupuxero. Masi eyo kehiyo ekeekhai voomalela. Owo muupuxero wa mutthu.

⁴³ Masi muupuxero w’ekeekhai onirwa mwaha wo wira otthuna wa Muluku. Munnona? Enakhaleru emosa, wala nikuphi nimosa paahi. Enakhaleru ekereja yuulupale, wala ekereja yamukhani, khiva mulattu. Owo onakhaleru muulupale, oolavula oratta-ene, wala mutthu ohinimusuwela ABC awe, khiva mulattu. Entthuneya mutthaka owo oniruuh’awe, wakhala wira ti wowuupuxeriwa ni Masu a Muluku, wala, ti wowuupuxeriwa ni miyuupuwelo s’ankhili wa muupuxero wa mutthu?

44 Atthu akina anniwerya okhala owuupuxeriwa mwaha wa mutthu oolavula oratta-ene. Eyo khenikhaliha sana. Imara sikina awo anikhala owuupuxeriwa okhala wira mulopwan'owo t'owiixuttihiwa vanci-ene vaniwery'awe ohela-mo ankhili awe. Eyo khenihimya wira ti ya Muluku. Munnona?

45 Ti mwa Masu a Muluku paahi a mahiku othene, Oohimala ni ooreerihiwa, onwery'ahu waakhela muupuxero, ni eyo enivahiwa ni Eroho Yowarya. Mwaha wo wamini hiyo ninnaakhela.

46 Vano hiyo naamupuwela mwaha wa Moise, ni okathi ula muulupale wa makhalelo awe. Ni hiyo noosoma, w'eyareliwo awe, ni moota Muluku aamukhapelenle awe, masi waahiphiya okathi mwa makhalelo a Moise vaavo vaatthuney'aya okhala okathi w'othanla. Hiyo naasomme-ene oratta-ene, hiyo ninniphwanya wira owo aari mwaana a mwaana muthiyana a Farawo, ni aari murithi a ehice, ni aamurowa okhala farawo ootharelana w'Ejitu. Vano owo aamuwerya oweha okathi waawehaweh'awe, numala okhala a iyakha ni oothokererya, ni yaahikhala ipottha iye sivaraka muteko munlittini mwa mattophe. Nto Moise, okathi waaweh'awe vacanelani wa empa ya mwene, ipottha seiyo Farawo aaweh'awe, masi evirikanelo aya yaari m'owehani.

47 Miyo kintthuna kilipiherye muupuwelo yowo, vaasiis'ula, mwa minutu vakhani, ni Muluku a Wirimu akelihe sana muhina wa khula murima mu. Ti moota nyuwo oniweh'anyu etthu p'itthu, enikhaliha yoovirikana.

48 Namalaleya muulupale, John Sprawl, yowo aari oorukunuxa murima muhina wa muteko wa Munna Bosworth, yowo anci-ene a nyuwo munimuupuwel'anyu iyakha sivinre, a Old Glory Barn. Owo aahimye wira, nihiku nimoso owo eetta mukwaha, ahinatthi okhwa mpwan'awe oophenteya ni mwaar'awe. Awo yaari oLa Salle, Lorraine, oFransa. Nto miyo kaahikhhalana mureerelo wo othotola nipuro nenno. Nto muhooleli aamwaahoola mmatta mwa maluwa, awoonihaka itthu soovirikana. Vano awo yaahiphiya mpakha etthontto emosa ya Pwiya Yesu, mwikimanyo. Nto Mwenye Sprawl aarimweemela, awehaxaxaka yeeyo, owo ni mwaar'awe, nto, mmurimani mw'aya, yaamuulumela etthu muratti aakhanly'awe okhalana mmuruni, wala namapattha, kiireke, okathi owo aahonth'awe vanlukuni, etthu yowooneya otakhala ele wira yooniherye ohaawa ni ophenta ni ikharari sa Pwiya Yesu, ni moota eyo yooney'aya okhala vootakhala murima n'uthikilasiwa. Vano muhooleli khimurweela Mwenye Sprawl, nto owo khwira, "Mulopwana, miyo kinoona wira nyuwo munuulumela etthontto ela ya Pwiya Yesu."

Nto owo khwira, "Kinimuulumela."

49 Nto owo khwira, “Miyo nkitikinihiwe hata vakhani, okhala wira athhu anci-ene aniweha yeeyo, emara yopacerya, awo annuulumela.”

50 Nto Mwenye Sprawl khwira, “Vano, miyo nkinoona hata othunku wala muupuxero w’oweha etthu ile, vano miyo kinixanka mwaha wa xeni khula namapattha opakenly’awe siisa.”

51 “Nto namapattha. . .” Khwira, “Mwenye Sprawl, etthontto ela eri oratta-ene, ni namapattha aarina etthu yooloka mmupuweloni mw’awe. Masi vatthu vari mulattu, ori ni nyuwo. Ti enamuna nyuwo eniweh’anyu.” Vano owo khunvara ole ni mwaar’awe mmatatani, khwaaroiha vathi mpakha w’altari vamuxereryo wa mwikimanyo ola woomimwa. Nto owo khwira, “Vano, Mwenye Sprawl, nwehe osulu vano.” Nto okathi owenh’awe osulu, owo khwira murim’awe waahalela omaala. Evirikanelo xeni yaakhanle, weemela vale n’uweha yeeyo *siisaale*, ni okhuruwela vathi n’uweha enamuna epakeliw’aya wira ewehiweke.

52 Nto ti siiso Muluku siry’awe. Ti siiso wamini ury’aya. Ti enamuna nyuwo oniweh’anyu. Nyuwo mwamuweha ntoko muthinto wa Bibilia a ehantisi, a etthu yaari ya mahiku avinre, nyuwo khamunkhalakhala muweryaka ophwanya mureerelo w’ekeekhai wa Bibilia. Entthuneya nyuwo mukokhore, ni muttharihele sooruma sa Bibilia ola, n’unweha Yowo ni maitho a Eroho Yowarya.

53 Miyo kaatthuna kikohe muthukumano ola, vaasiis’ula. Enniphwanyihani hiyo Muluku a ehantisi olelo vaari wira kahi Muluku mmosaru? Eniphwanyihani Muluku, yowo aarowa omukuxa Moise ni wira miirirya ni yowo seiyo owo siiraly’awe, yaarowa oniphwanyiha exeni hiyo osoma mwaha wa Muluku vaari wira Owo kahiyo mmosaru Yole olelo? Eniphwanyihani Muluku mmosa aawerya waahuluxa muttukutthani mwa moro, anamwane aHeperi, vaari wira Owo kahiyo Muluku mmosaru olelo? Eniphwanyihani Muluku mmosa aarowa ophuka yooreera ni yootakhala, mwa nihiku nivinre, ni ohukumu yootakhala ni oreeriha ele yooreera, vaari wira Owo kahiyo Muluku mmosaru olelo? Hiyo ninrowelani okereja? Hiyo nnihiyeryani itthu sa molumwenkuni, vaari wira Owo kahiyo Muluku mmosaru a mphukelo mmosaru, ni muupuwelo mmosaru Owo aary’awe okathi wothene? Yaarowa ophwanyiha exeni Muluku yowo aawerya okwannya ntata na muthiyana ni ehooma y’owali, ni ehooma khumaala, vaari wira Owo kahiyo Muluku mmosaru olelo? Yaarowa ophwanyiha exeni omurumeela Muluku aawerya omwiihana mpatthani Awe mmahiye, avinreene mahiku maxexe vaakhwiw’awe, vaari wira Owo kahiyo Muluku mmosaru olelo?

54 Mwa wamini hiyo ninnaamini wira nihiku nimosa noovuwa Owo onoonihana hiyo elapo ya vathi, hata nikhalaka ettuura enisareya v’eyopeni tho. Hiyo nnooniherya sai yeeyo? Hiyo

khannooniherya. Hiyo nnimwaamini. Hiyo khaninkeleliwa wooniherya hat'etthu. Hiyo ninvekeleliwa wamini.

⁵⁵ Mwaha wo wamini Moise aahiira *elexe-ni-elexe*. Nto okathi Moise, ntoko mwammiravo, aaweh'awe vacanelani y'empa ya mwene, ipottha, owo aanoona nikhuru nenno na ipottha noohasuwa, noonanara, ookhalana mavi a inama nenno Farawo oon'awe.

⁵⁶ Nto okathi Farawo aaweh'awe yawo, ni atthu a w'Ejitu, awo khayari hat'etthu wohikhala nikhuru na ipottha. Ti yeeyo tu awo yaaphwanel'aya; okhala atthu paahi anamawolowa mattophe, wira apake itixolo sa mattophe sa mureerelo wa ipoma Farawo aatek'awe. Ti siiso atthu a w'Ejitu ni Farawo yaaweh'aya ipottha.

⁵⁷ Masi Moise, okathi waaweh'awe yawo, waari oweha woovirikana Moise waarin'awe. Okathi owo waawehawe, aviraka vacanelani, mikhulaku suulupale witho waya, maithori yaamora mmalakuni mw'aya, ni irutthu saya sookhurupuwa, owo aaweha ntoko atthu a Muluku. Owo khaaweha ntoko ipottha. Owo aaweha ntoko atthu oothanliwa a Muluku.

⁵⁸ Nto, oh, ntoko miyo sinrow'aka, elapo t'ilapo, ni muttethe ti muttethe, kilaleyaka! Opacerya okathi kikhumaly'aka vamikhora s'etapernakulu ila, yela eri mutthenkeso eriyari ya miromolelo, yooikhhalana ekano woohikhala ophenta, nnakhala elivuru woohikhala Bibilia, ni nnakhala eyaminelo woohikhala Kristu, miyo kinnehererya waaweha axana a Muluku, ni ale ookhottiwa, akhanleene atthu a Muluku oothanliwa ni ootthommwa. Miyo nkinaakoha awo sinto aniira mpantta wa Branham Tabernacle. Miyo nkinaakoha awo sinto aMetotistaa, wala sinto awo maPrespiteriyano, wala sinto awo aPetekosite, wala aNazareno, wala aNawetta a moWaryani. Miyo kintthuna kaawehe paahi ntoko atthu a Muluku. Ni koonaka mairelo aya ni muteko aya, wira awo arumeyi a Apwiya Muluku. Ni murim'aka aka ontthuna opatthana ni yawo, hata wira awo arina maarakha xeni. Miyo kinniwehererya vanci-ene opatthana waya. Miyo kinnaphenta awo okhala wira koosuwela wira awo atthu a Muluku.

⁵⁹ Miyo kaamoonaka muthiyana arwaka mphironi, ni esaaya yoorakama, ni maihi awe opakiwa oratta-ene ottuli, ni—ni awanreene ikuwo soophwanela wona; ni omoona mwamuthiyana mukina, alakela oolikana wunnuwa, ni amuwanreene kaputtula mwamukhani; owo poti okhala, mwa onweha, ooreraxa vara vanli ntoko muthiyana orina maihi oorakama, nittharihaka muweheryo wa molumwenkuni, masi miyo kinoorowa mpantte aka ni mwarusi ule owanre ntoko muKristu. Enamwi atthu yaarowa okhala amutheyaka, ni amwiihanaka namasivelasiwa, nlelo, miyo kinootthara epantte aka. Owo poti ohikhala ooreera ntoko mwarusi mukina, mwa ekhalelo, masi owo onnoona etthu.

Mwaha wo wamini owo onnimoona Yowo Ole ori oohooneya, Ole oneetthiha makhalelo awe.

⁶⁰ Miyo kaamoonaka mulopwana omutekoni, aihaniwaka “tiyakono,” wala “mulaleyi,” wala “namasivelasiwa,” okhala wira owo onnikhootha omupaha sona, ni omuwurya saravexa, ni orowa m’owiinani, ntoko akina wa awo, nto owo onihaniwa “namasivelasiwa,” murima aka onsiveliwa ni yowo. Owo ti munn’aka, vathi v’etthaya ela ya w’Ejitu, yeeyo enkhaliha murim’ahu owehererya vanci-ene wira nimupatikhe ni wira, “Munna, hiyo n’anawetta ni amalapo, a elapo ela, ni miyo kinniwehererya vanci-ene opatthana ni nyuwo.”

Moise aahaana othanla, othanla mwa wamini.

⁶¹ Aximiravo akavi yaarowa okhootha mureerelo w’okhala mwaana a mwaana a Farawo! Aximiravo akavi yaarowa okhala ookhootha mureerelo yowo Moise aarin’awe, wira apuhe s’opuha sothene ni okarya wothene wa molumwenkuni, wira akhale mwene a w’Ejitu, okhalana olumwenku wothene munawoni mw’awe! “Etthu xeni yoohitthokeleleya,” aximiravo a mahiku awe yuupuwenly’aya, “okathi Moise aathanlaly’awe okuxa opuro awe n’atthu ale oohaaxiwa ni oohaawa a Muluku.”

⁶² Mwaha wa xeni owo iireny’awe siiso? Mwaha wo wamini, okathi owo aavenx’awe maitho awe, owo aaniweha ottai wa okarya w’olumwenku ula. Owo aaniweha ottai wa s’opuha sa etampi. Ni Bibilia ohimye wira owo aahilipiha murima ntoko onimoona Ole aari oohooneya, mwaha wo wamini, nto owo aahithanla omurumeela Muluku ahicaliki etthu yaarowa okhumelela.

⁶³ Eyo khevirikanne. Anci-ene a hiyo yaamuwerya orowa wa ele hiyo naarow’ahu wihana empa yooeeraxa. Hiyo naamurowa opuha, khino, opatthana ni s’opuha w’okilaathi nipuro noolokaxa mukereja. Hiyo poti okhala oosuwelaxiwa, owurya ni omupaha sona, ni owara ni wira ntoko olumwenku. Masi mulattu aya xeni? Nyuwo muvenxale maitho anyu, ni mwaha wo wamini munnimoona Ole ohinooneya, ni mookuxa mweemereryo anyu n’ale ookhoothiwa ni owihaniwa masantu oophirikeya a nihiku. Maana mwaha wo wamini hiyo ninnimoona Ole Ori oohooneya, nithanlaka ovira molupatthiwani ni mohaawani.

⁶⁴ Miyo nkaarowa waaleela atthu wira yaahaana othanla ohaaxiwa. Miyo nkinihimya wira nyuwo mwaahaana othanla ohaawa. Eyo khayarowa okhala etthu ya mutthu wira. Masi vaari wira ohawa ori mphironi mwa muteko, vano nrowe nikuxe ntoko onirw’aya. Miyo nkinthuna nyuwo wira etthu wira mutthu otheyeni. Miyo nkaathuna wira nyuwo muhimyeke itthu sovirikana, wira, “Miyo ka . . . Miyo kinira mpantta wa ekereja yeeyo ehinaamini *elexe-ni-elexe*, molumwenkuni,” ni itthu ntoko siiso, wira muwiirihe atthu wotheyani paahi. Nyuwo muniiruhela eyo mmansinyu. Miyo nkaarowa ohimya

wira nyuwo mukhume va murowe mwaire etthu yaarowa okhala olipa murima. Miyu nkaattuna nyuwo wira yeeyo, wira mutthu aire wira nyuwo mwa namasivelasiwa. Nyuwo muniiruuwela mmansinyu. Masi eyo yakhala mphironi wa muteko anyu vamaithoni va Muluku, muhiye olumwenku ohimye etthu awo antthun'aya ohimya. Nyuwo mukhale murowaka.

Nyuwo munoothanla. Khula mulopwana ni muthiyana ohaana wira ela.

⁶⁵ Ankhi Farawo aawenrye wona etthu Moise oon'awe? Owo aahoona ohaawa w'atthu. Owo aanisuwela esisapo xeni yaatthuneya oliva. Masi mwaha wo wamini owo khuthanla yeeyo, ohiya okhalana s'opuha sa etampi.

⁶⁶ Alakela aakhala vakhani, axirusi akilanthi va, mwamuthiyana owaarya. Olumwenku waamutthuna wooleelani nyuwo, "Mwiire *so-ni-so*. Nyuwo mooreera. Erutthu anyu ti yoopakiwa vooreeraxa. Nyuwo mwaahaana wooniha yeeyo."

⁶⁷ Masi, murokor'aka, muvenxe maitho anyu ni nwehe ottai wa yeeyo, wa Yole ohimye wira, "Ti yoonanara muthiyana owara ekuwo eri ya mulopwana."

⁶⁸ Vaari wira alopwana a atthu mmuttettheni mw'anyu, vaari wira axithiyana nyuwo munithukumanan'anyu, yiirale, "Mmetthe maihi awo oorakama. Yaamukhala yooreera. Yaamukhala *sa, sale, wala ekina*." Wala, "Eyo yaamookhalihani sana." Muhiwelele yeeyo!

⁶⁹ Nyuwo moovenxa maitho anyu, ni mwaha wo wamini moomoona Ole ohimye wira, "Ikharari sa muthiyana ti nttittimiho awe, ni owo khanrowa omettha."

⁷⁰ Awo yahimya wira, "Eyo yaamukhala yoosuweliwa. Nyuwo mwaamukhala sana ni muteko anyu, wala ni mukhulupale anyu, nyuwo mwakuxaru y'owurya y'opatthani. Vaari wira mwaanimupaha sikaro ntoko axithiyana akina, nyuwo mwaamukhala oopatthani sana ni namwaattamanani anyu."

⁷¹ Mwaha wo wamini muvenxe maitho anyu munwehe Ole ohimye wira, "Munanarihe erutthu ila, Miyu kinoopwetexa." Mwaha wo wamini hiyo ninnaamini itthu iyo. Eyo kehiyo hat'etthu nyuwo moonaly'anyu. Eyo etthu nyuwo munaamin'anyu. Mwaha wo wamini, Moise aahiira.

⁷² Nto mwa wetta wenna wo wamini, onnoorwa okathi onthuney'aya okhala y'othanla.

⁷³ Lotthi aahiira yoovonya ele yooxankiha hiyo nniir'ahu. Imara sinci-ene hiyo ninthanla mwaha wa mureerelo ahu. Hiyo ninthanla itthu saarowa okhala sooreera.

⁷⁴ Emara ekina wakhalaru onyakulihana vakhani mukereja, nto mutthu mmosa aamwiira, "Ahe, tiyakono wala pastore ori epantte ela." Muhiwehe yeeyo. Nwehe ele ekhanle ya xariya.

Mukumiherye etthu iyo ota ni mwaaruhe owanli aya vamosa. Eyo oreera murima.

⁷⁵ Wookhala othanla. Ni hiyo nniithanlela mmansihu. Hiyo ninthanla etthu ekhanle ya mureerelo ahu.

⁷⁶ Masi Moise aathanlale ohaawa ni ohaaxiwa, wira owo awerye wetta n'atthu a Muluku. Muupuwele yeeyo vano. Nwiryane yeeyo. "Aathanlale ohaawa w'atthu a Muluku, khoona yeeyo okhala muhakhu muulupale, maana owo aahilipiha murima, amoonaka Ole aari oochooneya."

Vano, Lotthi, emara emosa, aahaana othanla.

⁷⁷ Nto eyo poti okhala, vaasiisu ula, wira anoorkhala alopwana n'athiyana akilanthi-ene va, munrowa wira othanla w'anyu wookiserya. Nyuwo mwa ele muryanyu olelo, okhala wira iyakha sinci-ene sivinre khalai nyuwo mwaathanlale okhala yeeyo muryanyu vano. Ni ele enithanl'anyu vano enoohimya ele enrow'anyu okhala iyakha thanu ohoolo okhuma olelo. Iyakha thanu okhuma olelo nyuwo pooti okhala mulaleyi. Iyakha thanu opacerya olelo nyuwo poti okhala muKristu oosuweliwa.

⁷⁸ Wala, iyakaha thanu okhuma olelo nyuwo poti okhala omooroni, okhala wira mwiirale ethanlelo yoovonyeya. Iyakha thanu okhuma olelo nyuwo poti okhala mukukutthaka mihasa sinaamuleliwa maara mupaare. Iyakha thanu okhuma olelo nyuwo poti okhala namuttompe muramphani.

⁷⁹ Wala, nyuwo poti okhala mulopwana wala muthiyana ori—ori oororomeliwa mmuttettheni, mwaha w'othanla wanyu wa Kristu. Iyakha thanu okhuma olelo nyuwo poti okhala mOvuwani, orowa m'Okuxiwani, okhala wira muhiira othanla wanyu olelo.

⁸⁰ Masi nyuwo muhaana othanla. Ni muhiweheke ele munoon'anyu. Muthanle ele munoon'anyu mwaha wo wamini. Eyo t'itthu emosa tu enrowa ohimya, t'ile enithanl'anyu mwaha wo wamini.

⁸¹ Lotthi, ntoko owo aarin'awe y'othanla. Abrahamu aahinvaha Lotthi othanla w'awe.

⁸² Ni Muluku onnoovahani othanla wanyu. "Mmuthanle nihiku nla ole onrow'anyu omurumeela." Omatta w'oEdeni waahikhala mwiri wa—w'osuweliha, ni Mwiri wa Ekumi. Mutthu aahivahiwa mureerelo wira athanle mmosa owo aatthun'awe. Ni siiso t'eryaya olelo. Nyuwo munivahiwa mureerelo anyu, ntoko atthu a muupuwelo wootaphuwa, wira muthanle etthu p'itthu entthun'anyu othanla.

⁸³ Muruku aka wa nyuwo, t'ula, muhiweheke itthu sa naanaano seiyo sinoorukureryani, ni osuweliwa ni warya nyuwo mwaarow'anyu owerya okhala. Masi mmuthanle, kiireke, mwa wamini, Ole omuvanhe natiri wira nihiku nimoso Owo onimoorwa ni onimookolela sothene sivonyen'ye, ni

onimoovahani Ekumi Ehinimala, ni woohihimuxani. Hata wira nyuwo munikuxa ephiro yoothanyiwa n'ale vakhani a Apwiya, mwiire ethanleleo yeeyo. Sakhala milattu mmatatani, sakhala milattu mmuttettheni, sakhala milattu mukereja, sakhala milattu vatthokoni, hata ekhalaka exeni, mwiire ethanleleo anyu, "Mwaha wo wamini, miyo kinoomurumeela Muluku. Kinooyeviha murima aka Vamaithoni V'awe. Miyo kinookuxa ephiro n'axaana a Muluku. Miyo kinniwoona awo othanyiwa ni okhoottiwa, ni woomoliwa ni otheiwa, masi nlelo miyo kinookuxa opuro aka wa muteko. Miyo kinookhala vakhiviru. Ni awo yaanlaka, miyo kinimunla ni yawo. Ni wakhala muxankiho, miyo kinooxanka ni yawo. Enamuna awo ankhal'aya, miyo kinookhala."

⁸⁴ Ntoko Nowemi iiraly'awe... Ahiso, Ruthi wa Nowemi, "Iphiro sanyu sikhale iphiro saka. Iphiro saka sikhale iphiro sanyu. Vatthu vankhal'anyu, miyo kinookhala. Vatthu onrow'anyu, miyo kinoorowa. Muluku yowo nyuwo oninrumeel'anyu onookhala Muluku aka." Mukuxe ethanleleo yeeyo, hata wira enookhala yoorikaxa, ophima ele eniisuupuwelel'anyu okhala mutthu. Mwiiyevihe mmansinyu nto mukuxe ephiro anyu n'ale vakhani oothanyiwa a Apwiya, ni mukhale oororomeleya vapuwani wa muteko ni opuro wa muteko.

⁸⁵ Lotthi aahiwehaweha. Owo khwira, "Miyo kookhalana othanla." Nto owo aawenhe oSotoma. Owo aahoonna wira imatta sa malaxi saari sooreera ovikana iye Abrahamu oonaly'awe, ni vatthu Abrahamu vaaryawe. Owo aahiweha mureerelo w'osukiha mihuwo s'awe, w'okhalana mihuwo sooneneva ni sooreeraxa.

⁸⁶ Miyo kinroromela wira nkinsikuliha miyonelo sa mutthu. Masi eyo ti mukhalelo wa alaleyi anci-ene, wiisakaleliha ni Ehapari yooreera, yuupuwelaka wira anookhalana musurukhu munci-ene mwa yeeyo. [Munna Branham onimana ikuphi imara ttharu—Mol.] Ettikitti ya yolya! Miyo kaamuthanla okhala mutthayani mowuuma, olya, owurya mmuro, ni okhuura ipulaxa sa maakha, ohikhanle wiisakalela ni miyuupuwelo saka muhina wa Masu a Muluku mukumi. Miyo kinootthara ephiro aka.

⁸⁷ Akina a awo yaira, "Billy, mulattu xeni onikhala ni muthukumano anyu, okhala wira aakhala aPentekosite anci-enexa vaavo." Murumeyi mmosa muulupale a muromolelo t'ahimmye yeeyo.

 Miyo khwira, "Muromolelo anyu onookhapelela muthukumano aka?"

⁸⁸ Kahi khalai, murevistani *Look*, kookupali, aahikhala artiku mmosa. Nto namalepa aahimya mme, aalavula mwaha wa athu aPentekosite. Owo khwira, "Ekereja ya Pentekosite ekereja yowaakuvaxa wunnuwa mulaponi olelo." Mwaha wa

xeni? Okhala wira alopwana n'athiyana aroovenxa maitho aya khuweha ottaiwene.

⁸⁹ Ni namalepa ahaattotopela atthu aPentekosite. Oh, v'eekekhai, owo khwira, "Yaahikhala amosa amosa wa awo yaari oolipa murima, ni siiso. Masi, aMetotista anikokhorela eyaminelo. Awo animukokhorela Muluku ni eyaminelo. aPatista aniira etthu emosaru, ni aPrespiteriyano. Masi muPentekosite onikokhorela ni Bibilia awe."

⁹⁰ Mwaha wo wamini hiyo ninnimoona natiri. Miyo kinookuxa epante aka ni yawo, hata wira anithanyiwa mota xeni, miyo nlelo ka mmosa wa yawo. Hata wira awo anootheiwa, ni okhalana otteettheya n'ulipa waya, ntoko Isarayeli aarin'awe, miyo nkinkhalakhala kitthunaka okhala ni profeta owootha epante ya mwaako, Balaamu mmosa, ni weererya otakhaliha ele Muluku oreerinh'awe. Okhala wira, muttetthe ole wookhala Mwala woomaniwa, ni Mukuttho w'ephome, ni Nlumi na Moro. Hata wira awo ari muhina mwa xeni, nno ninniwetthiha mpakha mooxinttani, ni awo ahaana orwa mpakha memmo, okhala wira awo atthu avahiwe natiri aneetta ni wamini. Hata ahikhalaka muromolelo, awo yaari anawetta pure, ni siiso t'aryaya atthu a Muluku. Masi miyo kinthuna kitthare ephiro aka ni yawo, wiitakaniha ni yawo mmiphimoni mw'aya; kahi mwa muromolelo aya, masi mwa opatthana waya varyari va m'artiku a Eroho Ehinimala ya Muluku, yeeyo, mwaha wo wamini kaakhenly'aka opatiiso wa Eroho Yowarya. Muluku akikhaliherye wira okathi wothene kikhallane mwettelo yowo.

⁹¹ Nwehe. Okathi awo yaarow'aya, hiyo ninniphwanya wira Lotthi aahoonu mireerelo sa mi—mihuwo sooneneva. Anciene anoona mireerelo sa xahukho ooneneva. Anciene anoona mireerelo sa makhalelo ooreeraxa mmuttettheni. Owo onne okhala wa itoolare sikina vakhani. Owo onne oweryaneya w'okhala mukhulupale a mpoma. Aryene muletto, ni mutthu oosuwela vanci-ene, ntoko saaryawe, "Alakela miyo kinrowa okhala mukhulupale a mpoma." Owo onne oweryaneya okhala wira waanooneya ohoolo wawe. Masi owo khoona moro waari wira ohonone elapo. Owo khaaireerinhe mmansawe, wira elapo yaari yoosareya etampi, ni Muluku aahaana ohonona.

⁹² Ni, olelo, atthu aneererya wiireeriha mmansaya yiiraka, "Nyuwo mwa . . .?"

Miyo kinimwiira, "Nyuwo mwa muKristu?"

⁹³ Awo anira, "Miyo ka mutthu a wAmerika." Eyo kherina nata tho ni yeeyo ovikana weererya omwiirela nakhuku wira owo naphulu. Eyo khina nata n'iyoy. [Munna Branham onopa ikuphi emara emosa—Mol.]

⁹⁴ Eyo enoorowa ohononiwa, okhala wira Muluku t'exariya. Nto Amerika athikelaru arowaka ni itampi sawe, Muluku owarya ni a xariya, ni muulupale onoorowa okhanyereriwa wa—

waahihimuxa Sotoma ni Komora ni waavekela nlevelelo mwaha wo waapaha, mwaha wa itampi saya; Owo anihiyaru otthikela nirowaka ni yeeyo.

⁹⁵ Owo oohiyaruru orowa Wirimu ni miteko sanyu soohiloka, Owo ohaana omuhihimuxa Ananiya ni Safira ni waavaha okathi mukina. Owo v'ekeekhai aamwiira. Masi Owo naxariya. Ananiya oonne musurukhu awe. Pedru aamoonne Kristu.

⁹⁶ Oh, wulu! Lotthi khoonne ohononeya wa an'awe nipuro nne.

⁹⁷ Anci-ene a nyuwo, olelo, anivarela iyaminelo iya sookhaleleya sa khalai ni itthu, nyuwo khamunoonona onanara murima w'amwaavano ni ohononeya wa an'inyu. Nyuwo khamunimoona mwan'inyu mwamuthiyana mpani mwa anamittompe. Nyuwo khamunimoona mwan'inyu mwamulopwana namuhapaliwa, wala vameesa va iturufu nipuro nno.

⁹⁸ "Okhala wira eyo ti yookhalana maasi oratta-ene." Ni etampi khenikwanyyiwa. Owo khaamoonne mwaar'awe, muru wa maloko othene, khuthatuwa nripu na makha, okathi owo aaweh'awe. Owo khaamoonne ole avuluwaka woohikhala vakhani paahi, mpakha muttethe mwaamukhaani nipuro nlo, mwaha w'ekumi awe. Owo khoonne eyo, okhala wira owo aaweha paahi ele oon'awe ohoolo wawe.

⁹⁹ Masi, Abrahamu, owo khaawenhe elapo yookhalana maasi oratta-ene, maana owo aavenxale maitho awe khoona melo, maana owo aarowa orithi itthu sothene. muKristu a ekeekhai olelo onivenxa maitho awe ni omoona natiri a Kristu: "Ooreeriwa t'ale oowimaaliha maana awo anoorithi itthu sothene. Awo anoorithi elapo." muKristu a ekeekhai, mwaha wo wamini, oniweha osulu ni wona yeeyo. Mmwiihane khula etthu nyuwo entthun'anyu. Owo oovenxa maitho awe. Nto okathi owo viiraly'awe yeeyo, Muluku khwira, "Abrahamu, mweettelele elapo, yothene eyo ti yawinyu." Mwaha wo wamini, Abrahamu aahiira yela; wamini omosaru yowo Moise aarin'awe.

¹⁰⁰ Eyo yoolempwa ni mutaphuleli mmosa, yowo ohimnye ela. Miyu koono wira yaari moolumo ooreeraxa. Wira Abra-... "Moise aakunxe sooreera sa molumwenku khuhela vapalansani; ni etiini yootepaxa onanara, khuhela epalansa ekina; nto etiini yootepaxa onanara yaahilemelela ovikana iye sooreeraxa sa molumwenkuni."

¹⁰¹ Siiso t'eryaya olelo, wira hiyo naihaniwa etthu p'itthu hiyo entthun'ahu wiihaniwa, "anamasivelasiwa," wala "Anamavoniha a Muluku," wala "masantu-oophirikeya," wala etthu p'itthu awo antthun'aya wiihana. Yootepaxa hiyo ekhanly'ahu enoolemelela ovikana yooreera olumwenku onwery'aya ovaha. Muhitthune wiihaniwa "muhapo wa khalai, mutthu a khalai, anamasivelasiwa." Eyo enoovikana etthu

yooreeraxa yeeyo xetwani orin'awe wira oovaheni. V'ekeekhai enoovikana vanci-enexa.

¹⁰² Moise aatthunne othanyiwa wa Kristu. Owo aahimoonna Kristu. Ohoolo waya owo aahilavula moolumo oowerya ni a muupuxeryo mwaha wa Yowo. "Moone, Apwiya Muluku anyu anoomuthanla profeta oolikana ni miyo." Owo aahisuwela. Owo aahimoonna Yowo, ni owo aahoonna othanyiwa Wawe okhala muhakhu muulupale ovikana okarya wothene wa molumwenkuni.

¹⁰³ Mpatthani muKristu, olelo, nyuwo khamunwerya wira yeeyo? Ni okarya wothene ni osuweliwa wa molumwenkuni, mwaha wo wamini, hiyo nimmoonna Ole omuhimye natiri. Ni etiini yootepaxa onanara olelo, muhina mwa mukhalelo aya wothene, nlelo eyo enoovikana itthu sothene xetwani onwery'awe woovahani. Hiyo natholoxiwa, hiyo nathikilasiwa kapatti-kapatti, hiyo navelavelihiwa ni ovalaanyiwa, muhina mwa miromolelo ni onamasivelasiwa, eyo enoovikana etthu p'itthu xetwani onwery'awe woovahani. V'ekeekhai.

¹⁰⁴ Owo aahoonna othanyiwa wa Kristu okhala muhakhu muulupale ovikana mihakhu sothene sa w'Ejitu. Nto owo aahaana wira etthu. Owo aahikhuma w'Ejitu. Oh, miyo okisivela nuulumo nno. Owo aahikhuma w'Ejitu. Moone, owo aaweha ecanela emosaru, masi owo aaweha voovirikana ni Farawo. Ankhi Farawo aawenrye wona emalelo awe? Ankhi Farawo aakhanle owoona elapo awe emiriweene maasi? Moise aahoonna eyo. Sai? Ni siensia? Mwaha wo wamini, Moise aahoonna. Itthu sothene owo aair'awe saari mwaha wo wamini, okhala wira Muluku aahimuhimeerya Abrahamu, tith'awe, wira Owo aamurowa—Owo aamurowa othotola nloko nna numala iyakha imiya xexe, ni aamurowa waakumiha. Ni mwaha wo wamini, Moise aahaamini Masu Muluku aahimmy'awe, ni aanisuwela mmansawe, ntoko mwa wamini, okhala muhooleli oothanliwa wira aakhumihe-wo. Owo aanisuwela vatthu vaaryawe. Owo aahikuxa nipuro nawe munlittini mwa mattophe, ntoko namawolowa marove, ni khoona othanyiwa wa Kristu okhala muhakhu muulupale ovikana okilaathi vehiceni ya w'Ejitu. Owo aakunxe. . . Owo khaatonko ohimya wira, "Miyo koovariwa murima ni yeeyo." Owo aakunxe opuro aya khurowa ni yawo! Avuwihawe. . . Owo aakunxe opuro aya. Hiyo naaronwe ni yawo.

¹⁰⁵ Khivanixankiha namalepa owuupuxeriwa ohimmy'awe:

Miyo kinookuxa ephiro n'ale vakhani
oothanyiwa a Apwiya.

Miyo koopacerya ni Yesu, vano miyo kinoovira.

Miyo kintthara ephiro kirowaka muttethe
w'oKanani. (V'ekeekhai.)

¹⁰⁶ Moise. Yoohimmwa ni mutthu mmosa wira Moise aahamputi, okathi owo aawery'awe okhala mwaana a Farawo ni

aahikhalana okarya wa molumwenku, owo aamwamputi okhala mwaana a Abrahamu ohikhanle okhala mwaana a Farawo. Mwana a Abrahamu, oothanyiwa, ohikhanle okhala mwaana a Farawo, mwene.

¹⁰⁷ Miyo kaamuthanla okhala mwana a Pwiya Yesu, ni murumeyi Awe, ni okuxa opuro aka n'atthu oothanyiwa a olumwenku ula, ohikhanle okhala Mukhulupale a Estadu Unidu a w'Amerika ola, wala okhala Elvis Presley, wala Pat Boone, wala mutthu ti mutthu ontthun'anyu okhala. Miyo kinookuxa ephiro aka.

¹⁰⁸ Aximwali yaahaana okuxa ephiro aya. Ohiya okhala ma—Mary Pickford, wala muratti muulupale a ifilime, mwali mmosa a warya, mukuxe ephiro anyu n'ale vakhani oothanyiwa a Apwiya.

¹⁰⁹ Miyo kaamuthanla okhala mulaleyi vapulpitu, kilaleyaka muhakhu woohitaphuleleya wa Kristu, ohiya okhala muratti a ifilime a Hollywood, wala mutthu muulupalexa mulaponi. Vaari wira vaatthuneya wira kilye vakhani, oveka, wala etthu p'itthu yaathuneya wira kiire, miyo kinookuxa ephiro aka n'atthu a Apwiya. Mwaha wo wamini, miyo kinniira yeeyo. Miyo kinnivahiwaka mireerelo. Masi, ni mahala a Muluku, miyo nlelo kinoona ni wamini.

Ni wamini miyo kinniwerya woona yeeyo
ottaiwene;

Ni Tith'ihu oniwehererya mphironi,

Wira anitthokiherye nipuro n'okhala Iwe.

¹¹⁰ Mulipa a mpoosito wa soophwanya aairale, nihiku nno, “Murukunxenleni emp'anyu wira ekhale ekereja ele? Exeni ewiirin'heni ovaha empa ya itoolare ikonto miloko miili ni thanu wira muhele mutapernakulu ile ya khalai enooneya ntoko ikokhola?”

¹¹¹ Miyo khwira, “Kehiyo mwaha wa ekereja kiireny'aka. Mwaha w'atthu ari mme.” Miyo nkirina hata emosa wa sooreera s'olumwenku ula. Khula epenny ya musurukhu miyo kitonko aka okuxa oniheliwa ekereja yela. Mwaha wa xeni? Wamini waka ori mwa Muluku, kahi mwa itthu s'olumwenku ula. S'otthuna saka siri osulu. Ni miyo kookupali wira nyuwo othene ti siiso, nyuwo mwakhalaru sana ni Muluku. Eyo ekeekhai, wira mookhala. Hiyo, mwaha wo wamini, ninnaakhela. Hiyo, mwaha wo wamini, ninnimwaamini Muluku.

¹¹² Moise, owo aahaana wira ethanlelo. Nto vo owo aahaana, numala wira ethanlelo, owo aahaana owanana wamini, nto, maana owo khonve onanariwa wa mwene. Vano, mwa omutthu, owo aahaana ehakhi yo woova onanariwa. Owo aahaana ehakhi yowoova onanariwa wa mwene, masi owo khonve. Owo khaairale yeeyo, okhala wira owo aahikhalana muteko wira avare, ni owo aari muhina mwa muteko. Ni owo khayaamucali exeni

mwene aahimmy'awe mwaha wa yeeyo. Owo aahikuxa ephiro Awe vamosaru paahi.

113 Vano, Farawo, v'ekeekhai, okathi onoon'awe wira ooxinttiwa, owo aahitthuna onvaha Moise ni anamwane. . . Owo khwira, "Vaareera, miyo kinimooleela etthu enrow'aka wira. Nyuwo othene mukhale mmuttettheni ni mukhume murowe mwamukokhorele Muluku anyu."

114 Eyo p'inamuna xetwani sinvar'awe muteko. "Oh, nyuwo poti okhala natiini. Muhinrowelani ni witakaniha ekereja emosa emosa? Nyuwo khamurina yowira itthu iya sothene." Mulopwana onimuleela mwaar'awe. . .

115 Mwaar'awe onira, "Iy'aka, miyo kihoopowa. Hata manikuuri, wala epato ni itthu. Hata emosa wa seiya. Hata maira. Hata emosa wa itthu iya s'opatthani. Miyo koohiya iyo! Miyo kinooviriha okathi aka kisomaka Masu, kitthokihaka etthoko."

116 "Vano, nkawehani, mwaar'aka. Nyuwo, nyuwo poti okhala natiini, ti yooreera. Vano, nkawehani, nyuwo—nyuwo munrowa va. Nyuwo murina ekereja yoohiloka."

117 Nnari, nyuwo khamkhanle. Nyuwo muri ele yooloka. Nyuwo mwakhalana mulaleyi onrowa woolaleeryani yeeyo, nyuwo mwaahaana okhala ni yeeyo. Mutthikele mwaavyaka Solempwana muphwanye yaari yooloka.

118 "Oh," khwira, "murowe va. Awo kha—awo kharina yowira yeeyo va. Munnona? Awo khaniira eyo va." Eyo p'inamuna. . . "Muroweke ohoolo paahi." Masi owo khandthuna wira mukhume mmuttettheni. Eyo p'inamuna xetwani oniir'awe. Owo khandthuna wira nyuwo mukhume muhina wa itthu sa molumwenkuni; muruuhe paahi olumwenku muhina ni ekereja.

119 Nihiku nimosa, kikhuruwelaka ephiro, miyo kaahimuttukula ratio. Nto naahikhala n—nsipo, nto miyo kaahikhala kiwiriyanaka, ni kaahaana woonaxexa, ntoko, nsipo, kihinatthi ohimya sinto naari v'ekeekhai nsipo n'etiini, wala xetwani oneererya oruuha itthu sa Muluku mwa mukhalelo wa olumwenku. Khivanweryaneya wira siiso! Muluku akhalane othunku!

120 Miyo khenikicala isipo kavi Elvis Presley onlep'awe, a masipo othene ooreera a etiini. Owo nlelo t'ovariwa ni xetwani. Owo onnaaroiha anamawne anci-ene omooroni, ni ifilime sothene miyo sinuwel'aka, molumwenkuni mothene nihiku nla. Pat Boone ni akina wa awo, owo aaira mpantta wa ekereja ya Kristu; ni Elvis Presley, muPentekosite; awo ti maYuta Iskariyoti, mwa enamuna y'axilopwana ale. Xetwani oneererya oruuha itthu s'osulu sa Muluku, wira awo atakaniheke seiyo vathi va. Atthu khanrowa oweha vasulu va *yela*. Awo aniweha va paahi, aniira, "Ahe, eyo yothene emosaru." Kehiyo emosaru. Mukhumele ota wa muttetthe.

¹²¹ Khwira, “Nyuwo muroweke mahiku vakhani paahi. Nto nyuwo muroweke, mukhale mmuttettheni.” V’eekeekhai, owo aahisuwela wira awo yaamutthika. Nto owo khusuwela wira khayaarowa oweryaneya, vano owo khuupuwela etthu ekina yoovirikana. Owo khwira, “Miyo kinimooleelani etthu yowira. Nyuwo muroweke vatthu ti vatthu onthun’anyu orowa, masi mwaahiye axaar’inyu othene, ni an’inyu, ni mihuwo sanyu sothene, ottuli *wenno*. Muhiye seiyo wenno, nto nyuwo muroweke.” Okhala wira, owo aahisuwela wira awo yaahikhalana mireerelo ottuli iwe, seiyo saarowa waavara murima ottuli.

¹²² Nto eyo t’ile xetwani onohimeery’aweni nyuwo. Mwahiyaru paahi imosa imosa wa itthu sa molumwenkuni sipharenleene mwa nyuwo, nyuwo nlelo munnitthuna omupaha sona, munnitthuna owurya, nyuwo munootthuna owara ntoko olumwenku, eyo ti yoorera ntoko xetwani sintthun’awe.

¹²³ Miyo kinniiwa vanci-ene mwaha w’ohiiwa okristu. Miyo nkinkupali wira wokhala ohiiwa okristu vanci-ene ntoko atthu anuupuwel’aya wira wookhala. Awo anihiya paahi mireerelo sinci-ene w’Ejitu wira saavare murima ottuli, ti yeeyo tu. Ohiiwa okristu kehiyo ele awo anihimiy’aya okhala. Nyuwo muroohiya sinci-enexa sa molumwenkuni ottuli iwe, sinoovarani murima.

¹²⁴ Munna, miyo kinimooleelani, okathi Isarayeli aaryawe oolikana, ohiyu eriyari, awo yaahikhalana itthu sothene saarin’aya molumwenkuni mu, khutthukatthuka ni khulikana wira arowe.

¹²⁵ Muluku anirumihale muhakalaliho ntoko yowo. Hiyo nnootthukatthuka itthu sothene, n’ulikana wira nirowe. Okhuwela w’ohiyu eriyari onimoorwa, “Murowe mwakumane ni Yowo.” Vanreerela mukhalane itthu sothene sootthukatthukiwa. Vanreerela nyuwo muhikhalane hat’etthu, olumwenku ula, sinoovarani murima ottuli, hata nikwicili no wooruuhelani vathi. Mutthukatthuke. Nrowe nikhale oolikana. Hiyo nnoorowa.

¹²⁶ Nto nyuwo moosuwela? Miyo kinimooleelani, awo yaari a exariya ni Muluku, mpakha Farawo okhala oohaaxeya ohiyu eriyari, owo khwira, “Mukhume! Mukhume, muroweke. Mukuxe itthu sothene sirin’anyu, muroweke!”

¹²⁷ Miyo kinnitthapa wira mutthu onniwerya okhala vakhiviruxa ni Muluku, mpakha xetwani ohisuwela etthu yowira ni yowo. Eyo ekeekhai. Mukhume! Muroweke! Mmwiiwelele Muluku!

¹²⁸ Mwaha wo wamni, owo aahimoona natiri. Namawolowa a marove, wala oohikhala namawolowa marove, owo aakunxe ephiro awe n’ale vakhani oothanyiwa a Apwiya. Farawo khwira, “Mukuxe sothene nyuwo sirin’anyu mukhume va! Miyo

nkinsuwela etthu yowira ni nyuwo.” Owo aari a exariya ni Muluku, mwaha wo wamini.

¹²⁹ Wamini onimwiiriha miiriirya, nyuwo mwakhalaru a xariya ni Muluku. Mwaha wo wamini, hiyo ninnimoona Yowo.

Okathi ahu woophiya; okathi woovira.

¹³⁰ Masi, mwaha wo wamini, vaasiisu ula, muvenxe maitho anyu. Muhiwehe ele enoorukureryani, olumwenku ula wa vano, masi nwehe ni mmoone Ole omuvan’he natiri. Bibilia ohimnye wira, “Hiyo khannoona itthu sothene oratta-ene vano, masi hiyo ninnimoona Yesu.” Nyuwo mmuwehe Yowo, vaasiis’ula, nto iphiro sanyu sinoorukunxiwa.

¹³¹ Okathi onuuramih’ahu miru sahu, okathi vakhani, mwa nuulumo na mavekelo. Apwiya yincererye iparakhya saya Mmutthakani.

¹³² Muupuwele mmurimani mw’anyu vano. Nyuwo munikhala muwehaka itthu sa molumwenkuni? Mwaha wo wamini, munnimoona Yesu? Nyuwo muniweha osuweliwa wanyu, ekereja anyu? Mukhalelo anyu wa mmuttettheni molumwenkuni t’uvi? Wala, nyuwo munimoona Yesu Yowo, mwa ikharari, okilaanthi Mmansawe mono woolopwana wa Muluku oowerya-sothene Osulu, Yowo ohanwe ntoko namwiiviwa, naxariya mwaha w’ale ootakhala? Khamunwerya ovenxa maitho anyu ni wona Mwiri ule w’Ekumi ottai? Nto, muhiye mwiri ola w’ankhili ni w’osuweliha, ni mmurumeele Yowo.

¹³³ Mwaanitthuna wuupuweliwa mmavekeloni kihinatthi olompa? Muvenxe matata anyu, wa khula yoovekela nyuwo murin’anyu. Muluku ooreeriheni. Owo onnoona matata anyu othene.

¹³⁴ Nyuwo mwaari natampi, muvenxe maitho anyu nto nwehe vano. Nyuwo mwaakhalaka oohicaliwa, nyuwo mwaatonkone okhalana waakhulana vakhani ni itthu sikhani, evirikanelo xeni eyo erin’aya? Nyuwo munrowa okhwa nimosa wa mahiku awo. Nihiku xeni? Alakela olelo! Nyuwo khamuswenle. Ewora emosa okhuma vano, nyuwo poti okhala omooroni, wala nyuwo poti okhala Wirimu. Masi nyuwo muhaana othanla naanaano. Yakhala etthu p’itthu mmakhaleloni mw’anyu ehikhanle sana, muthanle vano, mwa wamini.

¹³⁵ Nyuwo muniira, “Ahe, miyo kaweryaru paahi opatthaana ni yowo! Miyo kaweryaru paahi opatthaana ni yowo!” Hata wira awo aniira exeni, muthanle Ekumi. Muthanle Ekumi.

¹³⁶ Maana, Yesu ohimnye wira, “Nyuwo mwaahimulevelele khula mutthu mmurimani mw’anyu sootheka saya, nnakhala Atith’inyu a Wirimu khanoolevelelani.” Vano nwiriyane yeeyo oratta-ene. Nakhala nthowa mmurimani mw’anyu ni mutthu ti mutthu, natampi wala naxariya, nyuwo muri oohalela orowa omooroni.

137 Vano muvenxe maitho anyu. Munoono exeni, nwanan'inyu? Wala, munimoona Moopoli anyu? Muniweha exeni vaasisu ula?

138 Mwaawereiwaka, ni tothoro onira khivanweryaneyya ovona, muvenxe nitho nanyu, mpakha vamwikimanyo, vaavo Owo onyakattiw'awe mwaha wa sotakhala sahu, ni makhwatta Awe hiyo noovonihiwa. Muhiweheke ele tothoro onihimy'awe; owo onivara muteko ni siensia. Wamini onivara muteko muhina wa mukhalelo wa Eroho ni Muluku. Nrowe nuupuwele itthu iya vano okathi onivenx'anyu matata anyu. Muluku ohoona.

Nivekele.

139 O Muluku Ohinimala, mwa mmaalelo wa mukokhorelo ola vano, numala Mutthaka okhuma, muhihiye ipyo iyo sa Masu Anyu, Pwiya, omorela etthaya ya maluku. Muhihiye Mutthaka, Pwiya, omorela vanampirivirini, miiwa, wira sooreera sa makhalelo ala (ntoko Lotthi) siphinyake, wookiseryani, sikhale soothanyiwa. Masi, O Muluku oottottopeliwa, muhiye simorele mutthayani yooreera, ni yowunttelana, mirima sowiiniwa. Ni mwa waka, nave, Pwiya, wira hiyo othene niwerye oweha ni ilumeta s'oweha sa Muluku, ni wona Ekereja yookhoottiwa ya Pwiya Yesu, atthu ookhoottiwa, ephiro yookhoottiwa, ni wira hiyo neetteke ephiro yela yoovuwa.

140 Ntoko Moise, owo khaasuwela otthu aarow'awe. Atthu khayasuwela otthu yaarow'aya. Awo khayasuwela ephiro xeni y'orowa. Awo yaaroopacerya paahi.

141 Nto, O Pwiya Muluku, okathi nsipo nla nooreera nnoopiw'aya, mwa wamini hiyo ninniweya wona Muttetthe ole ottaiwene. Ekhale naanaano va, wira alopwana n'athiyana mu ahuupuwele etthu olumwenku onrow'aya ohimya, wala moota awo anrow'aya. Awo avenye muroohoni mw'aya paahi, arowe.

142 Moise aatthara Warya, nto Owo waahimweettiha arowaka muttetthe wa natiri. Ahisuwelaka otthu aarow'awe, masi owo eetta moWaryani paahi, arowaka muttetthe yole waari wooreera ovikana nihiku.

143 Munivahe, Pwiya, olelo, wira anci-ene mu yeetteke moWaryani wa Solempwa ni moopatthanani wa Eroho Yowarya, ni n'Ekereja; Ekereja, Oopacerya oyariwa, axaana ayariwe naanaano yawo amwaakhenle Kristu, ni asarihiwe ni Eroho Yowarya, aneettihiwa ni Eroho. Wira hiyo neetteke mwa opatthaana yola, vamosa, varyari wa m'artiku a Muluku, nimurumeelaka Yowo mwa opatiiso, ni ottharihela wa okhwa Wawe, ovithiwa, ni ohihimuwa. Wira hiyo nimurumeele Yowo mwa sooruma Sawe, "Muhale oYerusalemu mpakha mwaakhele Owerya onikhuma Wirimu." Wira hiyo nimurumeele Yowo mwa ovonihiwa ni Muluku, naavekelelaka aretta. Wira hiyo nimurumeele Yowo mwa ekomunyau, nikawanaka mukatthe, ni ereerelo murima, othukumana mwa Masu a Muluku. Wira

hiyo nimurumeele Yowo mwa m'artiku Awe othene a oMuluku, mpakha Muttetthe orwa vamaithoni. Munivahe, Pwiya. Mwiiwe mavekelo ahu, siiso onvaherery'ahu sothene iya wa Nyuwo vano, mwa Nsina na Pwiya Yesu.

¹⁴⁴ Vano ni miru sahu sowuurama, voomaaleleya, murima-murima, nrowe niipe nsipo nla. Vano nno okokhorela. Mutthaka woomala. Ohikhale onikhuma. Mukhale oomaala paahi. Nrowe nikokhorele.

¹⁴⁵ Mutthaka t'uttharuxa. Muupuwelele vano etthu mmanly'anyu wira, etthu yaatthuneya nyuwo wira, etthu yookhalin'heni ele muryanyu olelo. Etthu enookhalihani oolamuliwa, olelo, okhala wira nyuwo murimwiira etthu nsana. Enrowa okhala xeni melo? Mukhalihe oratta-ene olelo, nto munookhala ootaphuwa melo. Munnona? Nyuwo muhaana othanla. Muniwerya sai wira? "Mwaha wo wamini, miyo vano kinnitaphula itthu sothene. Miyo vano kinnitaphula, nto nihiku nno miyo kinoorowa Iwe."

M'oreerani okathi onirwa,
Hiyo nnookumana m'oreera- . . .

Vano mwaakokhorele Apwiya muroohoni m'wanyu vano.

M'oreerani okathi onirwa,
Hiyo nnookumana n'Ikereja ele yoothanyiwa.
(Orowa woolipa, masi hiyo nnokumana
nihiku nno.)

Wa Tith'ihu ooreera murima osulu,
Hiyo nnoomuvaha nttittimiho n'ahu na
nttotopelo,
Mwaha wa yoovaha yoovuwa wa ophenta
Wawe,
Ni iparakha sinreeriha yawihu. . .

N'ale vakhani oothanyiwa a Apwiya, mwaha wo wamini, miyo kinnithanla.

M'oreerani (m'oreerani) mwa . . . (okathi
onirwa)
Hiyo nnookumana ophareya iwe wooreera;
(okathi onirwa)
M'oreerani (m'oreerani) okathi onirwa,
Hiyo nnookumana ophareya iwe wooreera.
Wookhala Muttetthe yowo ori . . .

Mmukokhorele Yowo paahi. Ola p'uri okokhorela.

. . . wamini miyo kinniweya wona,

Mwaha wo wamini miyo kinniira ethanlelo aka.

Oh, Atithi anoolipelela . . .

¹⁴⁶ Miyo kinniwoona othene ale ari a Apwiya Iwe; Munna George, Munna Seward, masantu othene.

. . .hiyo nipuro n'okhala Iwe. (Ayo, Pwiya!)
Yooreera. . .

¹⁴⁷ Atith'awe, Howard, Edward, axipatthani othene masantu
a khalai yale akunxe Ephiro, ottuli wu khalai, okathi munci-
ene khalai.

M'oreerani (Ayo, Pwiya!) okathi onirwa
(okathi onirwa),
Hiyo nnookumana ophareya iwe wooreera.
Hiyo nnoorowa wiipa iwe wooreera-. . .(O
Muluku!)
Isipo sooreera sa iparakha, (Avuwihwiwe
Muluku!)
. . .khaninrowa oxanka tho,
Nnakhala wunla mwaha eparakha ya Nipuro
nne n'omumula.
M'oreerani, m'oreerani okathi ni. . .(okathi
onirwa)
Hiyo nnookumana iwe wooreera-. . .



MWAHA WO WAAMINI, MOISE EMK58-0720M

(By Faith, Moses)

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku vaasiisu, mahiku yettaka 20 wa mweri wa Julho, 1958, oBranham Tabernacle oJeffersonville, Indiana, w'Amerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2019 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitumihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org